


成案質疑

賊盜十二

卷八十一




七	五	九	漢書門
五	二	二	
八	八	八	
冊	架	函	號類

九	九	漢書
二	二	
八	八	
冊	架	函
號	類	

內閣文庫	
番號	漢 9248
冊數	75 ( 33 )
函號	296 100

三十三





竊盜圖脫戮傷事主

乾隆九年六月刑部會議覆郭小春行竊拒捕致傷事主李振宗夫婦一案據東撫喀 疏稱郭小春于乾隆八年八月十一日三更時分潛至李振宗家踰牆進院推門入室事主之妻曲氏聞櫃響起視見門半開卽行關閉郭小春欲逃無路遂拾取木棍毆傷曲氏左額角倒地曲氏喊叫郭小春復毆其額門左肩甲郭小春急圖開門奔逃又被曲氏抱住其腿郭小春情極拔身佩小刀扎傷曲氏右臂膊右後肋併割傷右腿腓李振宗卽從後背抱住郭小春愈加窘迫復用刀扎傷李振宗左右胎膊左臂膊併割傷左後肋削傷右小姆指經事主之子李懷義聽聞趨救將郭小春擒獲拴縛因郭小春搯頭撒賴李懷義用棍毆其左腿邀同地方報官審認不諱將郭小春依例擬絞監候刺字等因具題查例內竊盜臨時拒捕傷人未死者首





犯斬監候等語今郭小春潛至李振宗家入室行竊經事主之妻曲氏聞響起視該犯並不逃避乃于曲氏關門之際輒持棍疊毆曲氏左額角顙門等處李振宗亦驚覺起捕該犯復用棍狠毆李振宗額角胸膛等處因棍斷折又枝刀連戳李振宗夫婦遍體鱗傷細核案情實係臨時格鬪並非追逐拒捕今該撫將郭小春照竊盜棄財追逐戮傷事主之例擬絞監候情罪不符應令該撫按例妥擬具題到日再議可也奉

旨部駁甚是依議

夜竊蒜苗拒捕刃傷事主照律加等治罪

乾隆九年九月刑部會議得李四行竊拒捕砍傷曹松一案先據河撫雅將李四擬絞監候等因具題臣部等衙門以律載盜田野穀麥菜菓者准竊盜論兇刺有拒捕者依罪人拒捕科斷等語查罪人拒捕折傷以上擬絞若係刃傷平復則於刃傷徒二年上加二等治罪並不槩行擬絞今李四行竊拒捕一案據該撫疏稱李四偷竊蒜苗見曹松撞來就要跑去曹松用鋤柄打倒又騎在李四身上用鋤柄連毆李四求饒不依渣拿有芝蒜菜刀往上亂架暗中砍傷頭臉曹松鬆手卽連刀子同蒜苗丟了跑去等語是李四既係准竊盜論非卽竊盜且曹松平復並未折傷與擬絞之例不符應令該撫詳審妥擬具題到日再議等因題駁去後今據河撫頭將李四改擬杖徒等因具題應如該撫所題李四合依罪人拒捕于刃傷人杖八十



徒二年上加罪二等律徒三年至配所折責四十板照例刺字再此  
案除錯擬罪名遵駁改正之按察使王丕烈未及更正之前任柘城  
縣知縣徐繩甲歸德府知府戚振鷺均照例免其查議外應將逾限  
一月以上之柘城縣知縣鄒懋衡照例罰俸一年奉

旨依議

竊賊打傷事主中風死比例擬絞

乾隆九年五月刑部會議覆盧賢裔等夥竊新會縣民孫植相家酒  
米衣物盧華標拒捕打傷事主之父孫述聰中風身死一案據護廣  
撫託 疏稱緣賊首盧賢裔與孫植相家住居相近知其家有蓄積  
易于行竊乾隆七年十二月二十一日在後山砍柴撞遇熟識之盧  
華標陳周猷亦同在山砍柴共談貧苦無米度歲盧賢裔即起意商  
同往竊華標及周猷各皆應允約定在後山聚會至晚各犯先後畢  
集同黨三人止盧賢裔攜帶鐵鍬餘俱徒手至三更時分齊抵事主  
門首盧賢裔用鐵鍬撬開大門同盧華標進內留陳周猷在外瞭望  
接贓盧賢裔先撬開左邊房門令盧華標入竊又撬開右邊房門自  
行入竊盧賢裔盧華標各竊出酒米交與陳周猷接運又復分竊衣  
飾錫器等物携往後山盧華標令盧賢裔陳周猷運贓先行復自轉



回仍入左邊房內再圖竊物因摸得木櫃疑有銀錢正欲扭鎖不期  
聲響驚醒事主之父孫述聰聲喊起捕盧華標驚慌逃走孫述聰追  
至房門拉住盧華標衣服盧華標情急隨手摸取門門毆打孫述聰  
左右手肱脰三處掙脫而逸奔至盧賢裔家告知被追拒捕毆傷孫  
述聰情由各犯隨點明贓物先將酒米鷄隻按股均分盧賢裔起意  
爲首多得夾被二床棉胎一床餘贓交給盧賢裔議俟賣錢再分各  
卽散踪次日盧賢裔攜帶衣飾等物赴墟賣與不識姓名人得錢一  
千三百六十文又復按股分受時事主孫植相在省貿易其父孫述  
聰年逾八十被竊毆打次日中風身死地保馬振騰往報孫植相回  
家具詞報縣查緝維時盧賢裔將棉胎絮入藍布夾被內攜帶出門  
尋覓僱工因無工主回家缺乏盤費將被賣與撐船水手馬亞吉得  
錢三百文適更夫馬萬元見疾姪馬亞吉置有棉被詢係買自盧賢  
裔卽查與孫植相失贓相似偕姪馬亞吉持被稟查經縣傳喚事主  
認係原贓旋卽拘獲盧賢裔等到案屢審不諱駐經事主認領其爲  
本案正賊無疑查律載竊盜事主知覺棄財逃走事主追逐因而拒  
捕自依罪人拒捕律科罪又犯罪逃走拒捕各于本罪上加二等毆  
所捕人至折傷以上者絞殺所捕人者斬監候等語今盧華標于各  
盜偷出衣服之後復行入竊驚醒事主之父孫述聰聲喊拏卽行驚慌  
奔走因孫述聰追及拉住衣服不放一時情急摸取事主家內門門  
打傷孫述聰左右手肱脰掙脫逃逸是乃拒捕求脫並非格鬪圖財  
似與追逐拒捕之條相符但孫述聰因追賊受傷卽于次日中風身  
死雖非盧華標手斃實由盧華標拒毆所致若將盧華標止于本罪  
上加二等問擬似屬太輕如照殺所捕人擬斬又覺稍重將盧華標  
比照竊盜棄財逃走事主追逐因而拒捕毆人至折傷以上律擬絞



監候仍盡本法刺字併遵例聲明恭候

諭旨遵行盧賢裔等分別擬杖等因具題應如該護撫所題盧華標比照竊盜棄財逃走事主追逐因而拒捕毆人至折傷以上律擬絞監候秋後處決仍將該犯比附罪名之處遵例聲明恭候

欽定該護撫既稱盧賢衣別起意行竊陳周猷隨同入夥均已携財先遁不知盧華標拒捕傷人情事盧賢裔合依竊盜贓一兩以上杖七十律應杖七十折責二十五板陳周猷合依爲從減一等律杖六十折責二十板俱照例子右小臂膊刺字先行發落買贓之馬亞吉訊非知情故買先行省釋墟上買贓不識姓名之人應免查究起獲之贓給主認領未獲之贓及應給馬亞吉被價應查各犯家產變賠分別給領本案同夥三人俱已全獲並無另有窩線且審屬竊賊拒捕並非強劫各犯亦無同居親屬知情分贓應毋庸議已起拒捕門門一條係事主之物應給還事主撬門鐵線據供遺失無憑起追等語應如該護撫所議完結奉

旨盧華標依擬應絞着監候秋後處決餘依議



事主傷輕平復兇犯仍照折傷律擬

雍正九年十一月刑部議覆署蕪撫王 疏稱緣賊首馬興欲行偷竊糾合褚三翁五朱三元王保六共夥五人于雍正八年六月初三日共駕馬興之船搖至華亭縣落馬灣地方停泊三更時候留王保六褚三看船翁五攜帶刀鑿火煤紙馬興攜帶麻繩同朱三元登岸行至王惟冲門首見其門旁草披內畜有牛隻馬興遂令行竊挖開籬笆同朱三元進內各細一猪肩負先行回船翁五入內竊出黃牛一頭被事主之弟王寶觀知覺追趕翁五卽棄牛奔逸寶觀追獲翁五情急隨將尖刀戮傷王寶觀左右血盆骨胸膈左乳等處寶觀喊援王惟冲聞聲趕至卽用扁担將翁五打倒以繩繫頸翁五伏地詐死乘間跳河脫迹馬興等在船聞喊先遁初八日王保六同翁五將猪賣錢一千零四十分散陸續聞獲翁五等歷審不諱王寶觀傷



輕平復將翁五等擬以絞杖等因具題翁五合依竊盜事主知覺棄財逃走事主追逐因而拒捕者依罪人拒捕律科罪犯罪拒捕毆所捕人至折傷以上律擬絞監候朱三元王保六褚三合依共盜之人不會助力不知拒捕傷人者止依竊盜論計贓一兩之上為從減一等律各杖六十已經折責刺字懸鈴帶枷充警毋庸議各犯所得之贓照追給主脫逃首犯馬興嚴緝務獲審擬另結并將賊船追變入官奉

旨依議

竊賊拒捕傷人

雍正八年 月刑部議覆舞陽縣賊犯于二小拒捕扎傷邢珮一案據河督田 疏稱于二小先會僱與周崇印家傭工周崇印與邢珮原係鄰居于二小常至邢珮家行走知其家道殷實雍正七年正月內于二小工滿出外資生無計頓起匪念于三月二十日傍晚暗藏邢珮菜園內等至天黑從前門進院潛入住房竊取錢衣正欲潛遁適邢珮進屋取燈撞遇樓抱喊叫于二小情急隨拔身佩小刀扎傷邢珮左脇肩甲邢珮負痛鬆手于二小奔出又被邢珮之弟邢哇追趕抱住于二小掙脫從後門逃走至次日將所竊裙衫當錢二百文并原竊錢一百二十文趕會花費旋被拏獲審認不諱事主邢珮傷已平復將于二小擬斬等因具題于二小合依竊盜臨時拒捕傷人未死例擬斬監候仍照例刺字已獲之贓給還事主未獲之贓在于



二小家屬名下追賠奉

古依議

竊盜拒捕傷人

雍正十年十一月刑部議覆平和縣民鄭成等行竊拒捕打傷事主黃虎一案據福撫趙疏稱緣黃乘與張堂素相熟識張堂探知黃乘之鄰人黃紂家畜有牛隻起意偷竊於雍正十年三月十三日向黃乘所知畜牛處所并知黃紂外出遂邀鄭成李叟李房四人於是夜張堂手執木棍李房隨帶鉄鑽鄭成李叟空手同至黃紂住屋樓外李房將所帶鉄鑽挖孔李叟搬移牆石窺內偷出鐵鈹二張布被二件藍布衫一件交與在外守候之張堂張堂隨將所執木棍轉交鄭成時黃紂之胞弟黃虎知覺喊叫張堂等驚懼携贓先遁鄭成落後被黃虎持棍追至溪坑邊地方鄭成失足跌擦兩膝黃虎舉棍向打鄭成鄭成將棍回抵傷及黃虎顙門黃虎扭住鄭成叫喊鄉保楊楚等聞聲繼至幫同黃虎將鄭成拿解歷審各認不諱將鄭成等擬



以軍杖等因具題應如該撫所題鄭成合依竊盜臨時拒捕為首傷  
 非金刃又傷輕平復例僉妻發邊衛充軍至配所杖一百折責四十  
 板該撫既稱張堂李叟不知拒捕情事所竊贓物共估銀一兩八  
 錢四分張堂合依竊盜為首得財計贓一兩以上律杖七十李叟合  
 依為從減一等律杖六十仍各刺字黃乘合依竊盜為從不行又不  
 分贓律笞四十免刺均先行折責發落等語應毋庸議已起贓物給  
 主收領未起贓物照追給主脫逃之李房緝獲另結奉

旨依議 謹查張堂等已携贓先遁應炤棄財追逐拒捕律註科斷

竊盜臨時傷人

康熙十六年正月刑部議覆盜犯李冕等一案臣部等因李冕偷盜  
 范天寵家持鑱刀架在天寵脖子上割傷三處嚇要銀杯兩隻索銀  
 五十兩而去擬以竊盜臨時殺傷人律事未允協駁行該撫詳審去  
 後今河撫佟 疏稱李冕乘范家後門未閉潛入房內竊取燭臺明  
 係竊盜迫推門進天寵臥室天寵驚覺取給銀杯復要銀兩天寵喊  
 叫李冕即持天寵家門傍鑱刀架在寵臂得銀而去明係臨時殺傷  
 人似應仍照原擬惟

恩詔內無竊盜殺傷人不赦之文應否援

赦聽候部議具題查李冕原因賭輸乘天寵後門未閉潛入其家竊取燭  
 臺後入臥房天寵驚覺取給銀杯復要銀兩天寵喊叫李冕即持天  
 寵家門傍鑱刀將天寵砍傷得銀五十兩而去天寵瘡痕自縊身死



李冕合依竊盜臨時有拒捕及殺傷人者皆斬律應擬斬監候事在赦前免罪獲賊給主仍照例追埋葬銀二十兩給付死者之家捕役陳心德等教唆李冕誣扳天寵親姪范爵為盜合依將良民誣指為盜發邊衛永遠充軍

赦前免罪革役捕役邱起龍等強拉事主驢頭計值價銀三兩合依枉法賊一兩至五兩杖八十律虞城縣知縣另案革職毋庸議奉

旨李冕持劍刀將范天寵臂傷三處嚇要銀兩以竊盜擬罪是否允協着再確擬具奏

行竊致傷事主

雍正八年 月刑部議覆清苑縣賊犯李進才等行竊孫鉞店內山西撫臣走摺家人張音衣服等物一案據直督唐 疏稱李進才籍隸陝西邈荒外出途遇馬有成馬成高三王三姜二同夥六人為匪由豫來直雍正七年七月二十七日行至清苑縣大激店村外高三起意與李進才等商謀偷竊俱各允從隨留王三姜二在村看守行李李進才高三分執鐵鍬鐵尺馬有成馬成徒手隨行于是晚二更時分齊至孫鉞店門張音自京回晉住宿孫店馬成在門外等候高三由牆上房進院馬有成李進才在房上接賍高三進房竊取被套二個遞給李進才高三復抽取兩搭因墮地聲響事主驚覺喊拏李進才馬有成持瓦拋擲擊傷張音門牙嘴唇手腕高三等携賍而逸嗣將李進才馬有成馬成拏獲審認不諱張音傷輕平復除馬成取





供後病故不議外將李進才照竊盜臨時拒捕傷非金刃例發邊衛充軍馬有成照爲從例杖一百徒三年均刺字脫逃之高三等緝獲另結再李進才有從前行竊河南府城北并孫家灣二處該犯僉供俱係挖孔偷竊並非強劫經臣咨查在案目應歸于此案歸結等因具題查該撫雖稱李進才等尚有行竊河南二處已經咨查在案自應歸于此案歸結等語但從前行竊之處果否是竊非強及有無殺傷事主未可遽以李進才等口供爲憑應俟咨查河南總督確覆到日從重歸結行令直督轉咨河東總督作速查明妥擬具題到日再議奉

旨依議

事主未曾擒捕輒行細縛不便照行竊拒捕科斷

乾隆三年 月刑部會議覆先據川撫碩 咨稱郭仕明等行竊趙氏家一案緣郭仕明係趙氏無服族姪素知氏夫郭白頭適有銀兩卽邀夥盜李文元李天然及伊弟郭仕賢同往趙氏家行竊至事主門首郭仕明李天然撬開竹壁各賊先後入室趙氏驚起喊叫拿賊郭仕明將趙氏拴住天然用髮腳細縛趙氏掙脫又拾藤繩綁住其手趙氏自跌火爐燒傷兩腿李文元等搜取衣被等物奔回因贓值無幾存貯未分事主並未具報經分駐赤水縣縣丞陳廷選查出會營陸續拿獲各盜通報屢審不諱將郭仕明依竊盜臨時拒捕傷人傷輕平復例擬軍李天然李文元照爲從減一等擬徒郭仕賢年未及歲照律收贖并聲明郭仕明等于行劫張文盛家案內從重歸結等因援免咨部臣部以竊盜臨時拒捕必有捉捕情事迫于勢不得



已因而殺傷事主方可照竊盜拒捕定擬今郭仕明因行劫張文盛家卽於是夜糾約夥盜李文元等往趙氏家行竊趙氏喊叫拿賊並未擒捕郭仕明卽同夥賊李天然用裹腳將趙氏細縛趙氏掙脫復取簾繩綁住其爲竊盜臨時行強無疑且趙氏燒傷兩腿明係承審官將各盜拷烙重罪故爲開脫抑勒事主改供希圖結案事關強劫未便率結駁令該撫嚴審定擬具題去後今據該撫咨稱嚴訊郭仕明等僉供撬開竹壁四賊鑽進潛行竊物李天然摸驚事主趙氏遽起拉住衣服喊叫拿賊是事主已經捉捕郭仕明知氏係瞽目急拿住其手李天然用裹腳細縛被氏掙脫復拾簾繩縛住無目之人卽不能追出聲喊便於奔遁非細綁之後又行搜劫也至其兩腳燒傷訊據趙氏供稱係賊去之後手被細縛行走無倚絆踢柴棒跌入火爐燒傷並未拷烙是郭仕明等正與拒捕之例相符承審官委無開

脫抑勒情弊仍照原擬於本案內將郭仕明等援免仍於行劫張文盛家案內從重歸結等因咨覆前來查郭仕明等行劫張文盛家一案該撫於乾隆二年內審擬具題經臣部等衙門議覆將起意上盜之郭仕明毆勒事主之李文元審擬斬決隨從上盜之李天然擬以發遣援免并聲明郭仕明李文元卽于本案正法李天然仍歸於行竊趙氏家案內從重歸結等因奉

旨欽遵咨行在案今據該撫咨稱覆加嚴訊據李天然供趙氏拉住衣服叫喊拿賊是事主已經捉捕其兩腿燒傷據趙氏堅供實係自跌火爐燒傷正與竊賊拒捕之例相符承審官委無開脫抑勒情弊查竊盜拒捕案件必事主恃強捉捕不能掙脫或持械趕打計無所出因而抗拒者始以竊賊拒捕定擬蓋拒捕正所以貪生故不得與強盜同科也今郭仕明等四人入室尙何畏懼一瞽目之趙氏縱趙氏拉



住聲喊儘可退避必不為彼所擒乃郭仕明拿住其手李天然既用  
裹脚細縛因趙氏掙脫復用簾繩綁住其為臨時行強毫無疑義且  
趙氏初供兩腿被賊拷烙要銀子等語供吐確鑿迨後審訊趙氏又  
供係自已跌倒燒傷是承審各官顯有抑勒改供情節事關連劫重  
情案內之李天然實係法難寬宥之犯該承審官諱強為竊故為開  
脫屢請率結殊屬不合相應題請

勅令該撫另委賢員確審實情定擬具題到日再議奉  
旨依議

扯鋏拖傷事主不作拒捕

雍正十年 月刑部咨據廣撫鄂 疏稱鄭理超等行竊香山縣民  
容永隆家牛隻一案緣蘇亞寧于雍正八年二月十四日挑柴往大  
布村戲場售賣偶遇鄭理超姚飛漢鄭春子姚維信鄭國文鄭開策  
黃亞狗皆在場看戲下午聚飲共談姚維信說及安墓母墳免眾幫  
助鄭理超等無銀以應蘇亞寧知容永隆家有牛隻遂起意竊牛相  
帮各皆允從同黨八人是晚一更時分齊躡鉄逕埔山坑蘇亞寧姚  
維信鄭春子鄭理超各携柴棍鉄鋏餘皆徒手三更時分潛至事主  
門首蘇亞寧姚飛漢鄭開策姚維信黃亞狗在外瞭望鄭春子用棍  
撬開事主之門同鄭理超鄭國文潛入屋內鄭春子解牛一隻交鄭  
理超牽出鄭國文取布衫一件因牽牛撞倒門扇事主喊追鄭春子  
等先行奔回惟理超在後趕牛被事主奪住鉄鋏鄭理超拖傷掌心



驅牛而遁各犯分逃而散鄭理超將牛交姚飛漢收藏迨香山汛兵追獲鄭春子蘇亞寧乃事主容永隆被竊不甘遂以強劫被傷捏報訊據鄭春子供開夥黨姓名陸續全獲研訊各犯供認不諱除蘇亞寧保候病故外鄭理超姚飛漢姚維信鄭春子鄭國文鄭開策黃亞狗均應照盜牛一隻例應各枷號一個月杖八十折責三十板仍刺字事主容永隆合依以竊報強例杖一百折責四十板均照例枷號折責發落已獲贓物給還事主未獲贓物將各犯家產變賠本案同夥八人俱已全獲審係行竊並無窩線原叅疎防各官應請免議再蘇亞寧係保候在外病故管獄職名無憑查開承審病斃一名例得免議職名應免開報等因具題應如該無所題將鄭理超等照例枷責刺字發落完結合咨前去查照施行

雖在旁目擊夥盜傷人究未助力仍依竊盜為從科斷

雍正十年六月刑部會議覆賊犯李言尚等行竊順德縣民李成餘家一案據廣撫鄂疏稱李言尚係李成餘無服族兄素知其家有財物起意行竊于雍正八年十二月二十三日糾約陳亞十劉而萬張振長張慶長同夥五人約定二十五日夜在沙坑橋邊聚會至期各帶戔銀等物會齊李言尚引路二更時分潛至事主門首李言尚恐認識先回沙坑橋邊等候張振長在外瞭望陳亞十用小刀鋏開板門同劉而萬等八人屋偷竊事主之父李勳臣驚起扭住陳亞十喊叫張慶長負贓先出陳亞十情急節拔小刀戳傷李勳臣右額角又傷左手中指陳亞十劉而萬隨即潛逃事主之弟李玉餘向前擒捕陳亞十又用小刀抵擋致傷陳玉餘左臂膊陳玉餘向奪其刀復被傷右手大指陳亞十脫身奔出同張慶長等同至沙坑橋邊俵分而



散事主傷經平復陸續緝獲李言尚等并據張兆章獲送伊子張慶長到案歷審各認不諱將陳亞十擬以斬流等因具題應如該撫所擬陳亞十應照竊盜臨時拒捕傷人例擬斬監候秋後處決該撫雖稱劉而萬入室搜贓見陳亞十拒捕傷人始行奔逸應照傷人為從律擬流等語但律內共盜之人不曾助力止依竊盜論今劉而萬雖見陳亞十拒捕實未助傷人劉而萬應與張振長均合依竊盜贓一兩至十兩為從律杖六十折責二十板俱刺字再為首之李言尚應依竊盜贓一兩至十兩律杖七十但該犯係事主無服族兄應照親屬相盜減一等律杖六十折責二十板免刺張慶長係伊父張兆章獲送應照親屬得相容隱者為之首如罪人身自首法減二等律笞四十折責十五板免刺俱先折責發落各犯並無同居親屬知情分贓均無庸議已獲贓物給主未獲贓物將各犯家產變贖本案同

黨五人俱已全獲審無另有窩線疎防文武各官免其查議奉

旨陳亞十依擬應斬着監候秋後處決餘依議



事主鄰人傷輕平復兇手仍照折傷律擬罪

乾隆三年十二月刑部會議覆許承興夥同林扶等行竊陳都等家耕牛拒捕截傷陳愛一案先據福撫盧 咨稱緣雍正十二年四月二十六日許承興路遇林扶陳寬言及貧難度日林扶起意糾同行竊許承興陳寬允從是夜林扶帶鐵錐許承興陳寬空手偕至陳都門首陳寬許承興在外瞭望接應林扶用鐵錐挖開牆孔進屋偷出耕牛六隻各牽二隻而走許承興因脚痛將牛一併交與林扶陳寬牽走林扶牽至諸邑三脚猫路邊賣與不識姓名人得銀一十八兩林扶陳寬二人對牛均分並未分給許承興至五月初一日許承興向林扶陳寬討取牛價林扶答以再偷一并分給許承興依允林扶復招同往竊陳從家耕牛是夜二更時分三人同到陳從門首林扶將隨帶小刀交付許承興許承興與陳寬在外守候林扶用鐵錐挖



孔入室偷出耕牛一隻當被陳從知覺喊起鄰居陳愛出追林扶陳寬棄牛奔遁惟許承興脚痛不能急走被陳愛趕至用棍打倒許承興爬起欲走復被陳愛抱住許承興不能掙脫一時情急將小刀戳去圖嚇釋手適中陳愛腦後偏右畧有微傷值陳從等繼至拿獲屢審供認不諱將許承興照盜牛五隻以上例擬以枷號杖徒援免等因臣部以許承興棄財逃走因被陳愛抱住用小刀戳及陳愛腦後畧有微傷雖與竊盜得贓臨時拒捕傷人者有間但竊盜拒捕以刀傷人比之被追拒捕者其情較重行令該撫妥擬具題等因咨駁去後今據該撫疏稱查許承興棄牛逃走被趕拒捕較盜牛五隻之罪本輕但以刀傷人較被追拒捕之情更重許承興除盜牛輕罪不議外合改照竊盜臨時拒捕傷人未死例擬斬監候刺字援免罪等因具題查律內凡竊盜事主知覺棄財逃走事主追逐因而拒捕自依罪人拒捕律科斷又註云臨時拒捕是格鬪以圖財追逐拒捕乃棄財而求脫其情異故其罪亦異等語今許承興夥同林扶等竊牛被事主喊追棄牛逃走因許承興脚痛不能急走致被陳愛追及用棍打倒許承興扒起欲走復被陳愛抱住許承興一時情急以小刀嚇戳陳愛腦後偏右傷已平復許承興正與追逐拒捕之條相符不應如該撫所題依竊盜臨時拒捕傷人未死例擬斬應將許承興改依竊盜事主知覺棄財逃走事主追逐因而拒捕毆人至折傷以上律擬絞監候秋後處決仍照例刺字但事在雍正十三年九月初三日十一月十四日兩次

恩詔以前相應援免並免刺字仍遞回原籍交與該地方官嚴加約束該撫既稱該犯從前並未犯案亦無窩家并同居親屬知情分贓事主陳都開贓不實旋即供明應與已經病故之陳寬及買牛之不識姓



名入俱毋庸議等語均應毋庸議該撫既稱陳從耕牛已經牽回等語亦無庸議陳都所失牛隻契價六十一兩應着落陳寬等家產變賠給還事主收領脫逃之林扶緝獲之日免罪追贓再此案錯擬罪名各職名應令該撫查明補奏奉

旨依議

竊賊一傷人一殺人均擬斬候

雍正四年二月刑部會議覆安東縣民徐四等行竊劉祥甫家致  
劉祥甫之子劉運漢一案據江撫張 疏稱緣徐四貧難度日知鄰  
居劉祥甫家有資財起意行竊糾同陶國陳大成一共三人于雍正  
二年閏四月十七日二更時候齊至劉祥甫門首陳大成從矮屋肥  
入開門放徐四等進內徐四先入廚房打火照看見無一物隨取其  
菜刀入劉祥甫臥室各犯正欲偷竊祥甫驚醒燈尚未滅陳大成恐  
其識認遂持棍擊祥甫頭顱昏暈祥甫之子劉運漢驚覺聲言認識  
徐四見事敗露輒用刀連砍運漢額顙連眉叢等處未及攬物而遁  
劉運漢傷重次夜殞命旋據陶國自行投首拿獲徐四等到案歷審  
各認不諱徐四等所犯尚在竊盜殺人定例限內將徐四陳大成均  
擬斬監候等因具題查雍正元年十二月初四日臣部題定例內開

賊盜

七十五

竊盜



竊盜臨時拒捕殺人者照強盜律擬斬立決臣部又題竊盜馬伯一案奉

旨竊盜拒捕傷人所定之例始行曉諭人未盡知馬伯着改為應斬監候秋候處決欽此欽遵于雍正二年三月二十六日臣部具奏江南省以六個月為期過期有犯竊盜拒捕殺人者照依定例議罪等因行文在案今據徐四等所犯尚在六個月限內應將拒捕殺人之徐四并傷人之陳大成均仍照竊盜拒捕殺人律擬斬監候秋後處決未曾拒捕自首之陶國應照犯罪未發自首律免罪奉

旨徐四陳大成俱依擬應斬着監候秋後處決餘依議

竊牛未得經事主追捕一殺人一傷人各盡本涉  
乾隆四年十月刑部會議覆竊賊林亞長二卽林正國等行竊茂名縣民陳廷爵家拒捕傷死陳廷爵并傷陳孔奇一案據廣撫王 疏稱緣林亞長二於乾隆三年二月二十日出至大路鋪買取烟柈適遇林偷牛二的名林郁成卽林亞二與鹽魚盤卽何引發及亞哨三卽楊有朝亞瘦李卽李永清同在車昇茂飯舖彼此熟識出至舖後嶺邊共坐談及貧苦亞瘦李卽告以鴨鵝村周劉二家畜有牛隻起意謀竊各皆應允時有廖成國廖汝志亦至嶺邊同坐亞瘦李商邀入夥廖成國廖汝志亦各允從約定是晚在車昇茂飯舖對面嶺邊聚會各犯如期畢集共夥七人亞瘦李帶有鉄鑽一把林偷牛二拔取籬棍一條餘俱空手二更時分行至鴨鵝村邊因犬吠人醒不能偷竊回至掃稗山各欲散歸亞瘦李又以盧屋村陳廷爵家有牛隻



乘便往竊各犯應允三更時分齊至事主村邊亞瘦李盞魚盤廖汝志先往探看見係竹門隨即轉回將鉄鑽交與林亞長二同林偷牛二在外把風亞哨三廖汝志廖成國在路傍瞭望亞瘦李即取林偷牛二身帶之榔剪一把同鹽魚盤踰墻入院先開圍墻大門潛至事主房門邊將榔剪鉞斷門挽撥開竹門驚醒事主陳廷爵持棍喊逐亞瘦李等各即奔逸林亞長二奔走不及將鉄鑽拒捕打傷陳廷爵偏左倒地維時事主之叔陳孔奇聞聲追出又被林偷牛二用柴棍打傷額顱及右臂膊各盜隨即奔逸陳廷爵傷重殞命陳孔奇傷旋平復是夜廖成國廖汝志各散回家亞瘦李等五犯躲匿山中二十一晚潛至陳華家藏匿陳華後又轉送伊姪陳高達家在歇隨陸續獲犯林亞長二等屢審供認不諱查律載竊盜事主知覺棄財逃走事主追逐因而拒捕者依罪人拒捕律科罪等語將林亞長二依罪

人拒捕殺人律擬斬監候照例刺字林偷牛二先于雍正十三年閏四月內行劫茂名縣民黃建中家案內免死減等援免詳記檔案今復行竊拒捕打傷事主應加倍治罪但律載加罪不加入於死林偷牛二依竊盜拒捕傷人傷非金刃又傷輕平復例擬軍亞瘦李亞哨三廖成國廖汝志擬徒陳華擬流等因具題應如該署撫所題林亞長二合依罪人拒捕殺人擬斬監候秋後處決照例刺字至垠打事主之林偷牛二先據廣撫楊 題該犯夥同陳奇等行劫茂名縣民黃建中家案內擬以情有可原經臣部等衙門議覆將林偷牛二免死減等援免詳記檔案等因題准咨行在案今復行竊拒捕應加倍治罪但名例內開加罪不加入於死等語亦應如該署撫所題林偷牛二合依竊盜拒捕殺人傷非金刃又傷輕平復例發邊衛充軍該犯妻室據供病故應遵照乾隆元年五月內定例刺字酌發雲貴極




邊烟瘴地方交該地方官嚴行管束其聞喊奔逃不知拒捕傷人情  
由之亞瘦李亞哨三廖成國廖汝志均合依竊盜夥衆至六人以上  
不論曾否得財首從並徒例各杖一百徒三年至配所折責四十板  
俱刺字俟徒限滿日遞回原籍交地方官嚴行管束不許出境陳華  
既知林亞長二等行竊拒捕傷死事主復窩藏在家後又轉引陳高  
達家藏灌林亞長二係擬斬之犯陳華合依知情藏匿罪人減罪人  
罪一等律杖一百僉妻流三千里至配所折責四十板陳華之妻梁  
氏該署撫既經驗明雙目俱瞎取有印甘各結應免其僉道該署撫  
既稱陳高達因陳華詭詞欺誑囑令暫歇不知林亞長二等行竊拒  
捕傷人情事應與賣飯不知情車昇茂均毋庸議已獲鉄鑽一把銷  
燬未獲柴棍榔剪據供棄失無憑起追本案各犯審係一時湊遇起  
意行竊並非強劫又未得贓亦無另有高線及同居親屬知情毋庸

置議等語均應如該署撫所議完結逸犯蘆魚盤應令緝獲另結再  
該署撫疏稱本案行竊傷人事在定例以前毋庸查叅疎防等語查  
竊盜臨時同夥拒捕與白晝夥衆搶奪之案先經河南按察使隋人  
鵬于乾隆三年二月內條奏照強盜例查叅疎防經吏部會同兵部  
覆准于乾隆三年三月二十三日奉

旨依議欽遵在案今此案係乾隆三年二月內行竊傷人事在定例以前  
相應免其查議奉

旨林亞長二依擬應斬着監候秋後處決餘依議





兩盜各殺一人一殺一傷應各盡本法

雍正十三年三月刑部會議稟賊犯顏疊行竊南安縣民李連家拒捕戮傷李連之子李厚并謝玖刀傷李連一案據福撫趙疏稱緣謝玖曾向李連無服族侄李騫言及窮苦李騫告以李連家有稻穀可偷謝玖即糾夥顏疊於雍正十一年十二月初六日至謝玖家會齊李騫不曾同往惟囑令謝玖等如偷有穀挑至伊家之語二更時候謝玖顏疊各帶小刀齊至李連門首挖堀進屋因遇牛欄謝玖等隨各牽耕牛一隻走出李連知覺同子李厚趕逐顏疊被李厚抱住急欲脫身將小刀戮傷李厚頂心偏左李厚仍不放手顏疊又用刀戮其胸膛適李連之兄李登趕至將顏疊人贓並獲謝玖看見棄牛奔援被李連扯住謝玖情急用刀戮傷李連額顱李連奪刀不放又割傷其手指李連傷輕旋經平復李厚傷重越六日殞命歷審不諱



將顏疊等擬以斬決戍杖等因具題查定例內竊盜臨時拒捕為首  
殺人者照強盜律擬斬立決為從者照免死減等強盜例分發吉林  
烏喇等處給披甲人為奴其傷人未死者首犯擬斬監候為從者發  
邊衛充軍等語詳玩例文凡竊盜兩人共殺一人者為首斬決為從  
擬遣其兩人共傷一人者為首斬候為從擬軍若兩人各殺一人或  
一殺一傷自當各盡本法不得以首從論今顏疊殺死李厚固應按  
例斬決謝玖各自戮傷李連自應照拒捕傷人未死之本法不得借  
稱隨從將謝玖擬以發遣曲為開脫應令該撫按例妥擬具題到日  
再議奉

旨依議

賊夥夜竊田禾一殺人一傷人各盡本法

雍正十一年四月刑部議覆麥連保等偷割東莞縣民陳達邦田禾  
拒捕戮死陳達邦并傷香作林一案據廣撫楊 疏稱緣陳迥仁探  
知陳達邦等田禾成熟起意偷割于雍正九年六月十三日晚糾合  
麥連保陳亞養陳五保張亞泰袁金保張福貴梁妹乃袁亞六梁福  
弟商量各皆應允十四日晚各帶扁挑鐮刀繩索共夥十人二更時  
分潛至陳達邦田所下田割禾適事主陳達邦與香作林醒覺持棍  
喊拿陳迥仁等六人聞喊挑禾先走麥連保張亞泰陳五保陳亞養  
在後被事主追及遂與拒敵張亞泰先用鉄嘴扁挑戮傷香作林右  
肋陳五保陳亞養亦用鉄嘴扁挑戮傷陳達邦右肘肘上下麥連保  
又用鉄嘴扁挑從後戮傷陳達邦後臀透至腎囊跌倒田間麥連保  
等隨即棄禾奔逸各犯先後回至屋後山脚取禾把俵分而散陳達

賊盜

八十

竊盜



邦傷重次早殞命香作林傷輕平復嗣經陸續拘獲陳迴仁等并據  
袁亞六梁福弟聞拿自首歷審各認不諱將麥連保等擬以斬戍杖  
笞等因具題應如該撫所題麥連保合依竊盜臨時拒捕殺人爲首  
例擬斬立決張亞泰合依竊盜傷人未死例擬斬監候秋後處決陳  
亞養陳五保合依竊盜殺人爲從例僉妻解部面上刺字遵照雍正  
十年十一月二十日題定發往查克拜達里克北路軍營附近地方  
種地俟臺站牛車辦理妥備具報到日卽行發往該撫旣稱陳迴仁  
等挑禾先走不知拒捕傷人情事陳迴仁合依竊盜爲首贓一兩以  
下律杖六十袁金保梁妹乃張福貫合依竊盜爲從減一等律笞五  
十袁亞六梁福弟聞拿自首應照知人欲告自首減罪二等律笞三  
十各照例刺字先行折責發落等語均毋庸議未起贓穀應將各犯  
家產變賠該撫旣稱各犯並無同居親屬知情分贓等語應毋庸議

奉

旨麥連保着卽處斬張亞泰依擬應斬着監候秋後處決餘依議 謹查

此案原招陳迴仁等所割田禾先經挑去麥連保等所割之禾未  
曾挑行寔係棄財拒捕應炤罪人拒捕科斷



賊傷事主均非致命以後下手者抵并夥犯另傷一人予以罪人

拒捕從罪

乾隆六年四月刑部會議覆閩縣賊犯劉光光等行竊拒捕刺傷事  
 主林義來身死併刺傷林義藻一案據署福撫王 疏稱乾隆三年  
 四月二十五日劉光光與素識之李斗斗林麻玲即林用燕李言仁  
 薛和劉則奇在南洲廟前言及貧苦起意商同行竊各犯允從是  
 夜二更時分即在廟前會齊劉光光帶有鉄鑿李斗斗帶有鉄錐林  
 麻玲李言仁薛和和劉則奇俱空手共夥六人同至林浦地方時已  
 三更李斗斗用鉄錐撬開事主林義來之門仍同劉則奇等在外把  
 風林麻玲劉光光先後入室林麻玲牽出一牛劉光光抱出二羊適  
 因羊叫林義來驚覺喊同伊兄林義藻先後趕逐各犯棄贓奔遁林  
 麻玲李言仁薛和和路熟前奔劉光光李斗斗劉則奇落後林義來




追至邵岐地方從後抱住劉光光不放李斗斗即用鉄錐刺傷林義來右腿林義來負痛釋手轉拿李斗斗劉光光輒將鉄鑿刺傷林義來右肋倒地時林義藻趕至扯住劉則奇李斗斗又將鉄錐刺傷林義藻右手大指并右腿右膝各犯脫身丟棄賊具而逸當經林義來之弟姪林義砥林宗趕至背扶林義來等併順途牽拾原失牛羊而歸林義來傷重逾時殞命嗣後據薛和和自行赴縣投首先後緝獲各犯到案屢審供認不諱查劉光光等棄賊逃走事主林義來追逐抱住劉光光雖係李斗斗先用錐刺傷林義來右腿但林義來尚能放手轉拿李斗斗自拿李斗斗之時被劉光光復用鉄鑿刺傷右肋林義來隨即倒地則林義來實爲劉光光刺死無疑將劉光光擬斬監候李斗斗等分別流徒刺字併取具李斗斗並無妻室印甘各上三司等因具題應如該署撫所題劉光光合依竊盜案財逃走事

主追逐因而拒捕者依罪人拒捕殺所捕人律擬斬監候秋後處決照例刺字李斗斗十合依爲從減一等律流三千里至配所杖一百折責四十板該署撫雖稱不知拒捕情由之林麻玲李言仁合依竊盜夥衆六人以上不分會否得財首從並徒三年例各杖一百徒三年刺字先經逃逸不知拒捕情由後聞拿自首之薛和相合依知人欲告自首律減罪二等杖八十徒二年免刺等語但竊盜夥衆六人以上不分會否得財首從并徒三年之例業經律例館以竊盜計贓科罪乃不易之經設如人多拒捕或持械行強自有應得本罪若仍是行竊回不必論其人數之多寡與器械之有無蓋刑貴得平計所得之贓定應得之罪寔屬明允等因奏准在案林麻玲李言仁應仍依竊盜已行不得財律各笞五十折責二十板薛和相合依知人欲告自首律減罪二等笞三十折責十板均各免刺該署撫既稱各犯訊



無同居親屬知情分贓並無窩線地保隣佑均不知情並非容隱應免提訊逸賊劉則奇緝獲另結等語應均如該署撫所議完結奉旨劉光依擬應斬着監候秋後處決餘依議



在田竊禾一束拒傷田主工人致死比例擬絞

乾隆三年七月刑部會議覆香山縣民鄭以德毆傷張遠成身死一案據署廣撫王疏稱緣張遠成受僱于賈顯宗看守田禾乾隆二年九月初八日早鄭以德家貧無米往田拾取遺穀窺見賈顯宗田禾已割偷取一束被張遠成巡獲連禾捉交更夫鄭近義送官張遠成仍回田巡禾鄭近義念鄭以德係同族兄弟遂未看守回家早飯鄭以德旋亦走回路經田邊張遠成看見向扭爭論用拳先打鄭以德面頰鄭以德回拳抵格適中張遠成心坎時有隣田鄭學成看見奔救不及報知伊兄張遠燦背回張遠成逾時殞命屢審供認不諱查雍正七年閏七月內前署撫臣傅題袁高牯偷竊曾奇榮鷄隻毆傷曾奇榮身死一案將袁高牯擬照竊盜拒捕殺人例斬決經刑部議覆以袁高牯非入室行竊拒捕改照開殺律擬絞監候在案今



鄭以德與袁高牯之案相符應將鄭以德依闕殺律擬絞監候鄭近  
 義擬杖等因具題查袁高牯偷竊曾奇榮之鷄被曾奇榮知覺搜尋  
 袁高牯急圖脫身毆傷曾奇榮身死一案將袁高牯照竊盜拒捕殺  
 人例擬以斬決具題經臣部等衙門以袁高牯見曾奇榮鷄放墟亭  
 乘空攘取與入室行竊者不同後曾奇榮知覺將袁高牯掌批疑其  
 藏在腰間復低頭搜尋袁高牯情急圖脫拳毆曾奇榮一下移時殞  
 命非拒捕可比將袁高牯改照闕殺律擬絞監候等因題准在案今  
 該署撫疏稱鄭以德並非入室行竊拒捕與袁高牯之案相符等語  
 應如所題鄭以德合依闕殺殺人律擬絞監候秋後處決鄭近義不  
 將鄭以德卽行送官又不看守致令釀成人命合依不應重律杖入  
 十折責三十板已經發落鄭學成奔救不及應毋庸議奉  
 旨鄭以德依擬應絞着監候秋後處決餘依議

竊賊放火燒斃多命比例斬梟

雍正十三年三月刑部議覆蘇撫高 疏稱江都縣民王麻子先因  
 犯竊盜刺字責逐出境于雍正十一年三月十二日夜復糾同李墜  
 子趙傍子劉四謀竊許仰山家適仰山宴客未散不能行竊王麻子  
 輒起意放火乘機搶奪前赴許仰山附近張鵬萬草房將火點放趙  
 傍子劉四畏俱先逸張鵬萬驚覺喊眾撲滅王麻子復將火紙擲于  
 范爾進後簷屋上時因夜深人靜火烈風猛延燒居民一十四家有  
 周祥之妻持拜匣出走王麻子上前搶奪當被拏獲李墜子亦卽續  
 獲到案范爾進與妻駱氏女范氏被焚先後身死謝子貴高德華沈  
 維正三家共被焚傷男女六名口俱經醫治平復歷審不諱王麻子  
 李墜子俱應依放火故燒官民房屋律擬斬監候查王麻子一犯起  
 意放火搶奪延燒一十四家燒傷六人燒斃三命兇慘已極擬斬監



候不足蔽辜應請照強盜殺人放火例擬斬梟示聽候部議趙倭子  
劉四獲日另結等因具題王麻子應照強盜殺人放火例斬決梟示  
李隆子合依放火故燒官民房屋律擬斬監候該撫既稱王麻子李  
隆子俱係赤貧所燒房屋無可賠償等語應毋庸議逸犯趙倭子劉  
四獲日另結奉

旨依議 謹查李隆子未曾下手放火遠議斬候似屬可商

竊盜殺人

康熙三十八年 戶刑部覆江撫洪之傑疏稱鄧文耀探知無服叔  
祖鄧穉濟得有會銀三兩糾沈七二陳大同夥三人挖洞進房驚醒  
穉濟之妻馮氏持刀欲起陳大以手巾蒙氏眼目又同文耀將氏手  
足細綁沈七二用紙填塞氏口竊取銀衣等物馮氏氣閉斃命鄧文  
耀合依竊盜殺人律皆斬事在

赦前僉妻流三千里仍追埋葬銀二十兩付死者之家沈七二陳大獲日  
另結奉

旨依議



竊盜臨時強劫殺人

康熙四十三年八月刑部議覆楊城等刺死事主黃毛一案先據福撫梅將楊城等照竊盜拒捕殺人審擬斬罪具題臣部以楊城糾集翁明等各執鐵鎚木棍等項同往行劫殺死事主黃毛明係強劫且該督撫將疎防文武各官並承審遲延之員俱照盜限題參在案如果楊城等並未行強該督撫豈肯將疎防並承審遲延各官俱照盜限題參楊城等持械殺人行劫止依竊盜定擬不合令該撫確擬具題到日再議咨行去後今據該撫仍照原擬等因查楊城等如果止圖竊牛豈有執木棍扁挑其所帶器械據稱非劫殺器械而劫殺所用器械又有何分別且事主之妻陳氏曾兩次報稱家貲物件被盜一空何得稱楊城等止竊牛二隻明係支離再此案經巡撫批查該縣曾經前任知縣邱勳明被盜情形申報始以強盜題參疎防



官員追經拏獲楊城等之後又經研審一載有餘並未供報行竊且該撫亦以強盜將承審遲延之員題參况楊城等一齊動手殺死事主仍不逃避復劫取其牛隻衣服而去楊城等雖係行竊而臨時強劫殺人之處是直該撫仍將楊城等照竊盜定擬殊屬不合應仍令該撫覆加詳確具題再議奉

旨依議

借宿之人追賊被殺照拒捕殺人

雍正元年 月刑部會覆安撫李 題查王富曾在陳有祿家彈綿見其積有米穀閑向王新春言及王新春起意偷竊遂約江新富王化貴王秋生陳光子汪神保陳其篇王呈陳芝王富陳元貴適王呈肚痛未行陳芝不肯同去王新春等九人于康熙六十年十二月十九日夜二更時分齊至事主屋旁汪神保陳元貴在外接賊王新春等用鑿撬開板壁進內竊取米石等物事主喊叫各賊携贓奔逸是夜適有陳四女借宿陳有祿家聞喊持刀追逐江新富情急用挑米柴棍回打陳四女之脚王富用扁挑打四女頂心等處四女倒地各盜奔至王秋生家分贓而散陳四女傷重殞命照竊盜拒捕殺人律分別完結




竊賊因抽鐮致死事王照過失殺擬

康熙六十一年 月刑部會看得楊寶致死王秀業一案先據江撫  
吳 將楊寶照拒捕殺人律擬斬援例留養等因具題經臣部題駁  
妥撥具題去後今據該撫疏稱楊寶往竊田草被秀業趕奪其鐮楊  
寶抽鐮欲走適傷秀業身死似與思慮所不到初無害人之意而偶  
致殺傷之律相符楊寶應改照過失殺人律擬絞收贖等因具題楊  
寶合依思慮所不到初無害人之意而偶致殺傷人准聞毆殺人罪  
應收贖給付被殺傷之家律應收贖給付被殺之家再該撫疏稱擬  
律未協之承審各官部駁後已經改正例得免議等語應毋庸議奉

旨依議





竊盜遲駐後拒捕殺人

康熙四十三年八月刑部會議覆竊賊劉二等拒捕致死寡婦楊氏一案據直撫李光地審擬斬杖具題查劉二知伊族中寡婦楊氏家內有糧起意偷竊與劉五商定糾酌劉文立甄文元同夥四人于康熙四十二年十一月二十五日一更時分齊至楊氏門首劉五恐其認識在外等候各賊撥門入室文立竊取高糧交與劉五劉二與甄文元進楊氏臥房竊取麥子出付劉五時楊氏知覺聲喊甄文元用被將楊氏蒙住楊氏亂滾以致同宿之女四姐驚醒問時劉二亦用褥將四姐蒙裹楊氏滾墜炕下喊叫甄文元復用帶勒楊氏咽喉當時身死各賊潛逃次日將劉二等拏獲歷審情真劉三合伙竊盜臨時拒捕殺傷人者皆斬監候律應擬斬監候秋後處決劉文立合伙共盜之人不會助力不知拒捕殺人者止依竊盜論一兩以下杖六



十律應杖六十折責二十板刺字劉五亦應照竊盜律杖六十刺字但劉五係楊氏族中小叔應照無服親屬相盜者減一等免刺律應減一等笞五十折責二十板免刺已獲糧食給還屍親其脫逃之甄文元嚴緝獲日另結奉

旨劉二依擬應斬著監候秋後處決餘依議

佈捕竹簽致死事主改照罪人殺所捕人科罪

雍正六年二月刑部會議覆古田縣民張如視等盜竊耕牛致死何朝侯一案據福撫常 疏稱鄭畿觀知妻兄何朝景家畜有耕牛一隻商於常康厚令其糾賊往偷勒銀取贖常康厚遂邀張如視及王長往竊鄭畿觀慮事主知覺追趕於雍正四年十一月十三日晚同常康厚先到何朝景家穩住事主何朝景留住夜飲一更時候張如視潛入何朝景家偷出牛隻交與王長牽牛先行藏於窰內張如視將預削竹簽六根佈插途中以防追逐何朝景之弟何朝侯知覺喊追適踹竹簽戳傷脚腕流血仆地何朝景同弟朝基等繼至將何朝侯背回托常康厚代其尋牛常康厚勒銀五兩代贖次日何朝景如數措銀交與常康厚牽回原牛各犯分贓而散何朝侯傷重越十六日殞命何朝景不甘具控歷審各認不諱除鄭畿觀取供後解審病



故外查竊盜張如視佈插竹簽傷死事主與臨時拒捕殺死事主稍異將張如視比照罪人殺所捕人律擬斬韋康厚王長依竊盜為從律擬笞等因具題除鄭畿觀取供後解審病故不議外該撫既稱竊盜張如視佈插竹簽傷死事主與臨時拒捕殺死事主稍異等語張如視應如該撫所題照罪人殺所捕人律擬斬監候秋後處決該撫既稱韋康厚王長不知插簽情由俱依竊盜一而以下為從擬一等律各笞五十折責二十板仍刺字已經發落均毋庸議所得贓銀各照追給還事主奉

旨張如視依擬應斬着監候秋後處決餘依議

打倒事主攫取原竊銀衣後毆事主立斃不便照罪人拒捕科斷乾隆三年十二月刑部會議覆竊賊張奇鳳拒捕毆死黃國堯一案據護湖撫張 疏稱緣黃國堯偕弟黃國瑚駕船前往麻市溪裝炭至新溶地方因灘陡水急與伴船兌拉上灘將衣褲銀包解放船內先將伴船拉上伊船在後適奇鳳路過船邊見船內無人偷竊銀衣等物而去黃國堯弟兄查知被竊分途追趕黃國堯追見張奇鳳手夾原衣即喊同在坡種地之向珍六協力擒獲搜出原竊衣銀用繩拴項拉投保正詎張奇鳳畏罪頓起殺機乘黃國堯牽繩前走順拾石塊向黃國堯髮際偏右極力一擊黃國堯昏跌倒地張奇鳳攫取原竊衣銀因氣未絕復拾大石毆破黃國堯顙門偏左立時斃命將屍推置水邊而逸是晚黃國瑚見兄未歸次早沿途查訪至向珍六門首詢知伊兄獲賊繩拴往投保正情由隨路追尋途遇張奇鳳仍



携所竊原衣拉獲至船搜出衣銀究獲兄屍解縣屢訊不諱查竊盜  
臨時拒捕殺人例應斬決今張奇鳳係竊後捕獲畏罪拒殺與臨時  
拒捕之例有間將張奇鳳依罪人拒捕殺所捕人律擬斬監候等因  
具題查張奇鳳因黃國堯船內無人偷取銀兩衣物隨經事主黃國  
堯知覺追獲原物而張奇鳳輒用石擊傷黃國堯髮際偏右昏地仍  
攫取原竊衣銀實係護賊格鬪並非棄財求脫後見黃國堯生氣未  
絕復拾石毆傷顛門偏左立斃其命更與畏罪拒殺者不同今該護  
撫將張奇鳳引罪人拒捕律擬斬監候殊未允協應令該護撫再加  
研訊妥擬具題到日再議奉

旨依議

行竊次日途遇相爭賊犯砍死事主依故殺定擬

雍正六年九月刑部會議覆建安縣民劉和仔砍死徐洋奴一案據  
福撫朱 疏稱緣劉和仔與徐洋奴同里居住雍正五年十二月十  
八日晚劉和仔竊取徐洋奴之米被徐洋奴窺見喊叫劉和仔旋即  
奔遁十九日劉和仔持斧往山砍柴途遇徐洋奴欲捫劉和仔往投  
地方兩相爭角徐洋奴即打劉和仔劉和仔隨用斧砍傷徐洋奴額  
顛倒地徐洋奴拾石擲打劉和仔劉和仔因見徐洋奴血流不止總  
不得活復用斧砍其頂心登時殞命歷審不諱劉和仔雖行竊徐洋  
奴之米但聞喊旋遁於次日途遇爭角斧砍徐洋奴致死與臨時拒  
捕殺人者有間將劉和仔擬斬刺字等因具題應如該撫所題劉和  
仔合依故殺律擬斬監候秋後處決刺字奉

旨劉和仔依擬應斬著監候秋後處決餘依議



行竊後拒傷事主并戮死捕役比例斬決

雍正十三年五月刑部議覆楊麻子等行竊劉聲遠麥船拒傷事主  
 蕭天孟并戮死捕役秦恩一案據蘇撫高 將楊麻子照竊盜臨時  
 拒捕殺人例擬斬立決卞三照為從例發邊衛充軍刺字等因具題  
 該撫既稱楊麻子行竊傷人又拒捕殺死捕役寔屬悍惡兇暴照本  
 律罪止斬候不足以懲兇悍合比照竊盜臨時拒捕殺人律擬斬立  
 決等語查竊盜臨時拒捕傷人未死及犯拒捕殺人按律均止擬斬  
 監候但該犯既已行竊戮傷事主後又殺死捕役雖非于行竊之時  
 臨時拒捕寔已兩犯斬候之罪洵屬惡兇暴應將楊麻子比照竊  
 盜臨時拒捕殺人例擬斬立決仍遵照援引別條比附定例于疏內  
 聲明請

旨遵行卞三合依竊盜臨時拒捕傷人未死為從例刺字僉妻發邊衛充



軍至配所責四十板已獲麥船給主收領未獲賊麥追賠奉  
旨楊麻子着卽處斬餘依議

竊賊挑還柴中途被事主毆罵因而還毆致傷事主身死

雍正十二年九月刑部會看得大興縣王有明拒捕打傷王二身死  
一案據直督劉 疏稱王有明與王二同村居住素無嫌怨雍正九  
年十月二十八日王有明見王二地內堆有樹枝遂竊二捆挑赴青  
雲店貨賣適王二是日亦往趕集撞遇認出卽將王有明辱罵勒令  
送回王有明允從遂挑樹枝先行王二騎驢尾隨途次復將王有明  
辱罵并用所執鞭杆毆打旋至高村空地王二嫌王有明行走不速  
復加毆詈王有明不能忍受亦行還罵王二被罵忿怒輒持鞭杆毆  
打有明王二撲空墜驢下地王有明怨其起毆遂用所挑樹枝扁担  
連毆王二腦後偏右并右耳根項頸等處王二站起接住扁担不放  
王有明乘勢連戳其心坎并毆其左肋以致王二臥地王有明遂將  
樹枝擲伊身上而逸王二受傷深重立時殞命歷審不諱將王有明擬



斬刺字等因具題應如該督所題王有明合依盜山野柴草木石拒捕殺人者照罪人拒捕殺人律擬斬監候秋後處決仍照例刺字奉旨王有明依擬應斬着監候秋後處決餘依議

赦後行竊殺人已擬斬候免其加倍

乾隆九年三月刑部會議覆茂名縣竊賊蘓茂等行竊拒捕石傷事主蔡瑞光身死一案據廣撫王疏稱緣賊首歐狗兒向在各村收換廢爛銅鐵稔知事主蔡瑞光開張米舖家內積有財物起意與族兄歐汪三商謀行竊歐汪三允從同夥二人於乾隆七年四月二十一日夜三更時分潛至蔡瑞光門首歐汪三在外接贓歐狗兒用鐵鑿撬門入室竊取銅錢衣物遞交歐汪三接收歐狗兒復進內摸獲竹箱一個見其沉重料有銀錢因力不能舉正欲撬鎖被事主之子蔡宗賢驚覺叫喊歐狗兒心慌逸出同歐汪三携贓奔回蔡瑞光因失物無幾未經稟報次早歐狗兒往趨梅棗墟撞遇熟識之蘓茂談及貧難度日歐狗兒貪心未厭遂告以先竊蔡瑞光家摸獲竹箱沉重定有銀錢邀其同往偷竊蘓茂應允約定二十四日夜在梅棗東



門頭竹欄地方聚會而散至期歐狗兒陡患腹痛不能同行惟歐汪三攜帶鐵鋏前往竹欄地方會同蘓茂于二更時分齊至蔡瑞光門首蘓茂用手空開圍牆竹門與歐汪三同入院內因犬吠尚未空門進屋惟時蔡瑞光在舖算賬該舖離家甚近聽聞犬吠疑有竊賊回家巡視見牆門已開即在門首截住喊捉蘓茂無路可走一時情急隨拾地上石塊向擲欲圖嚇開蔡瑞光讓路奔逃不意適中蔡瑞光鼻梁倒地蘓茂歐汪三先後奔走逃遁蔡宗賢併隣人李乾占等聞聲開門出視詢知被賊擲傷情由同扶蔡瑞光進屋調治詎瑞光傷重延至次日午後殞命屍子蔡宗賢投明練總報驗旋據練總龍士國訪知歐狗兒携贓出賣與失單所開衫褲相符稟縣拘訊供出同夥姓名併蘓茂石傷事主身死情由起獲原贓先後拘獲歐汪三蘓茂訊據蘓茂將入夥行竊及拒捕石傷事主蔡瑞光身死各實情供

認不諱查律載竊盜事主知覺棄財逃走事主追逐因而拒捕自依罪人拒捕律科罪共盜之人不會助力者止依竊盜論等語今蘓茂尚未入室竊贓一經事主蔡瑞光喊捉即欲奔走因被蔡瑞光攔門不能脫身始行拾石向擲致傷蔡瑞光身死蘓茂合依罪人拒捕殺人律擬斬監候照例刺字歐狗兒歐汪三擬杖併聲明蘓茂先于雍正十二年在交趾青煤海面行劫蔡日升等客船案內免死減等援赦免罪釋放詳記檔案今復行竊拒捕石傷事主身死已擬斬候免其加倍治罪等因具題應如該撫所題蘓茂合依罪人拒捕殺人律擬斬監候秋後處決仍照例刺字該撫既稱蘓茂先於雍正十二年在交趾青煤海面行劫蔡日升等客船案內免死減等援免釋放詳記檔案今復行竊拒捕石傷事主身死已擬斬候免其加倍治罪等語蘓茂應免其加倍治罪再該撫既稱歐狗兒雖屬起意並未同行歐汪



三雖經在場並未助力俱應止依竊盜論除是夜行竊未得財輕罪不議外其先于二十一日夜偷竊蔡瑞光家錢物據估值銀一兩二錢審係歐狗兒起意爲首歐狗兒合依竊盜贓一兩以上至十兩杖七十律杖七十折責二十五板歐汪三合依爲從減一等律杖六十折責二十板查歐狗兒從前曾經犯竊刺字今係再犯應照例於面上刺字歐汪三係屬初犯照例刺臂先行發落事主蔡瑞光初突被竊不報因失物無幾恐報官往返耽悞生理今已被傷身死毋庸議練總龍士國與事主居住隔遠又因事主不行投明故未稟報亦毋庸議獲贓給領未獲追賠行竊鐵鑿及行兇石塊俱已遺失無存無憑起追各犯並無同居親屬知情分贓亦無窩線均無庸議等語均應如該撫所議完結再該撫疏稱本案審係竊賊拒捕殺人並非強劫兇賊已經全獲疎防職名應免查叅等語查定例竊盜同夥拒捕殺傷人若已經獲有爲首下手兇賊免其查叅疎防等語今此案該撫既稱係竊賊拒捕殺人兇犯已經全獲等語疎防各職名均應照例免其查叅奉

旨蘓茂依擬應斬著監候秋後處決餘依議



竊盜拒捕殺人准赦免刺

康熙四十二年七月刑部會看得據直撫李光地疏稱賊犯張五等  
 殺死事主儲邦才一案緣逸賊張大用知儲邦才家道頗殷起意偷  
 竊遂糾張五王大胖同夥共三人于康熙四十年六月二十八日夜  
 各帶小刀鐵尺踰墻入室竊取衣服等物之際適邦才小便開門走  
 出王大胖見而遂捨院中木棍擊打邦才賊犯張五聞聲出院亦拾  
 棍毆打邦才邦才抱住張五張五呼救王大胖即以鐵尺毆邦才手  
 背張大用又以所佩小刀連扎邦才太陽等處竊取贓物分遁邦才  
 傷重殞命本年七月二十九日陸續拿獲張五王大胖歷審情真  
 應將張五王大胖照竊盜臨時拒捕殺人律擬斬監候但先有竊盜  
 王發才等拒捕勒死王氏復燒屍滅跡一案于康熙三十六年七月  
 十九日



赦免在案今張五王大胖似應減等援

赦擬流等因具題張五王大胖應照竊盜拒捕殺人者斬監候律應擬斬

監候秋後處決但伊等事犯在康熙四十二年三月十八日

赦前張五王大胖應免死減等僉妻流三千里至配所各折責四十板仍  
追埋葬銀四十兩給付死者之家已獲贓物給主未獲之贓照例追  
賠其持刀連扎事主致死之逸賊張大用嚴緝獲日另結再張大用  
所分之贓伊叔張焯既稱並未窩藏應將張焯取保釋放俟拿獲張  
大用之日審結其承審遲延各官已經題叅議處毋庸議奉

旨依議

夜竊田秧被追去棄傷死事主之僕依罪人拒捕科斷

雍正十一年五月刑部會議覆新會縣民馮二勛偷秧拒捕致傷呂  
氏之僕張永祿身死一案據廣撫楊 疏稱緣呂氏租有馮家涌尾  
田一坵播種秧苗于雍正十年四月二十三夜令僕張永祿看守在  
寮睡宿適馮二勛亦持棍往尋已秧二更時分路經馮家涌尾見呂  
氏田中秧好卽乘便下田偷拔張永祿在寮內醒覺持棍出擒馮二  
勛棄秧逃走張永祿追至識認馮二勛呼名喝打馮二勛將棍迎格  
打傷張永祿左手腫脹張永祿之棍墮地馮二勛用棍向打張永祿  
用手擋格被傷手腕負痛蹲地馮二勛懼其拾棍還打又用棍連打  
張永祿頂心偏左張永祿傷重越十六日殞命歷審供認不諱將馮  
二勛擬斬監候照例刺字等因具題應如該撫所題馮二勛合依罪  
人拒捕殺所捕人律擬斬監候秋後處決奉



台馮二勛依擬應斬着監候秋後處決

夜竊田禾傷死事主工人未下手之竊首亦依爲從定擬

雍正五年 月刑部議覆廣撫常 題東莞縣聶亞三等盜禾傷死  
鍾亞興一案查陳華峰知鍾允協田禾成熟起意盜割糾約聶亞三  
鍾亞三聶亞六李如芳彭紹謨同夥六人至陳華峰禾場會齊各執  
鎗刀扁挑鎌刀于雍正四年十月 日一更時分齊抵田所聶亞三  
陳華峰把截來路鍾亞三等四人在田割禾適鍾允協同工人鍾亞  
興執械往巡見人割禾鍾亞興執刀趕前喊拿聶亞三持鎗攔阻鍾  
亞興舉刀向砍聶亞三用鎗抵格適中鍾亞興咽喉倒地陳華峰並  
未助力見已傷人急喚鍾亞三等將禾挑遁鍾允協奔回告知亞興  
之兄鍾亞福遂同往看亞興業已殞命鍾亞三等挑禾至陳華峰禾  
場分贓而散歷審不諱查律內強割田禾依搶奪科之搶奪殺人者  
照竊盜拒捕殺人例擬斬立決聶亞三合依搶奪殺人例擬斬立決



陳華峰雖無幫助致死鍾亞興但造意割禾以致聶亞三鎗傷鍾亞興身死不應擬徒合改照搶奪傷人爲從減一等律僉妻流三千里至配所責四十板鍾亞三聶亞六李如芳彭紹謨並不傷人均合依搶奪爲從減一等律徒二年半至配所責三十五板俱刺字陳華峰等所得贓谷應照追給主奉

旨聶亞三着卽處斬餘依議

竊賊傷死隣人與殺事主一律科罪

乾隆六年三月刑部會議覆閩縣民林顯顯等行竊陸慎安家潘卿佐拒捕毆傷隣人張時德身死一案據署福撫王疏稱緣潘卿佐昔曾犯竊乾隆四年九月十九日晚有素識之同村居民林顯顯董葛葛至伊家中坐談林顯顯因貧難度頓生匪念商同潘卿佐行竊潘卿佐應允并喚董葛葛隨行二更時分同夥三人林顯顯携帶潘卿佐家廢壞菜刀以爲撬門之具餘俱空手潛赴江橋墩地方見有低牆無門董葛葛在外瞭望林顯顯同潘卿佐入牆潘卿佐在旁把風林顯顯用刀撬挖事主陸慎安屋壁陸慎安知覺喊叫隣人張時德驚醒卽執鉄鈹趕出林顯顯聞喊當與潘卿佐逃出董葛葛聞聲先遁林顯顯疾行追及董葛葛同歸潘卿佐落後被張時德趕上舉鈹向毆潘卿佐情急轉身奪過鉄鈹卽用鈹柄還打適張時德回身



賊救中傷左後肋骨折仆地潘佐卿帶鈿而遁張時德之弟張時采  
并陸慎安聞聲奔救逸扶張時德回家尚能言語告知認係潘卿佐  
毆傷張時德傷重逾時殞命續經獲犯到案屢審供認不諱查潘卿  
佐尚未入室得財卽經事主叫喊張時德係貼隣有協拿之責聞聲  
持鈿出擒潘卿佐逃遁因張時德追毆以致奪鈿回打傷重身死將  
潘卿佐等擬以斬笞等因具題應如該署撫所題潘卿佐合依竊盜  
棄財逃走事主追逐因而拒捕者依罪人拒捕殺所捕人律擬斬監  
候秋後處決仍刺字該署撫既稱林顯顯所帶廢壞菜刀實係圖擣  
門壁之用並非兵器與隨行之董葛葛俱先奔歸不知拒捕情由應  
各依竊盜本律科斷林顯顯起意行竊合依竊盜已行不得財律笞  
五十董葛葛合依爲從減一等律笞四十均予免刺照例先行分別  
折責發落潘卿佐于雍正八年行竊候邑民人嚴汝鼎牛隻前經照  
例枷責刺字追贓發落林顯顯董葛葛訊係初犯各犯並無窩線亦  
無同居親屬均毋庸議等語均應如該署撫所擬完結奉  
旨潘卿佐依擬應斬着監候秋後處決餘依議



竊盜致傷事主同居隣佑身死不便依鬪殺率結

乾隆九年二月刑部會審覆張三麻子行竊割傷事主隣佑南商氏  
手心身死 案據京撫略 疏稱張三麻子與徐作珍素相熟識徐  
作珍見張三麻子年幼會令偷竊其祖棉袍當錢分用乾隆八年二  
月二十四日徐作珍見隣居張閻氏往坡拾柴繼見張閻氏同院之  
南商氏亦赴庄外進與徐作珍素知張閻氏家有衣服起意行竊回  
家携帶割穀刀拿遇張三麻子教令偷竊偕至張閻氏院西牆外徐  
作珍將刀遞與張三麻子帶爲撥門之用架送過牆徐作珍在外等  
候接駐張三麻子刀撥窓門入室正在檢拾衣服適南商氏回家見  
張閻氏志開查問張三麻子踰窓而出南商氏扭衣不放張三麻子  
跪求因南商氏聲喊驚懼手捫其口指甲抓傷南商氏耳根咽喉南  
商氏釋手張三麻子取刀欲遁南商氏往奪迎傷右手指背浮皮仍



兩手奪住刀柄張三麻子欲行跑逃隨勢往後抽刀以致刀刃割傷南商氏手心倒地磕傷右肢腮張三麻子棄錢携刀甫欲出門值張閔氏回家見而詈罵張三麻子奔逸詎南商氏傷重延至三月初四日殞命審認不諱將張三麻子依鬪殺律擬絞徐作珍依竊物未得財律擬笞等因具題查律內竊盜事主知覺棄財逃走事主追逐因而拒捕者自依罪人拒捕律科斷又律內犯罪拒捕殺所捕人者斬監候各等語今張三麻子行竊刀割南商氏手心致死南商氏雖非事主但與事主張閔氏同院居住張閔氏既未在家則伊家被竊南商氏卽係應捕之人當張三麻子在張閔氏屋內偷竊衣物經南商氏撞過拉衣喊拏既抓傷其耳根咽喉等處及南商氏奪伊所執之刀該犯卽可棄刀奔逸乃不放手仍猛力抽奪以致刀割南商氏手心斃命雖非護贓格殺而其拒捕情形實已顯著該撫依鬪毆律定擬與律不符至此案起意行竊之徐作珍屢次教誘張三麻子爲竊併交給小刀以致張三麻子拒捕割斃南商氏該撫僅擬輕笞亦未允協事關賊徒拒捕殺人不便率結應令該撫再行詳審按律妥擬具題到日再議可也奉

旨依議



竊後捕賊又未奉文被傷身死照聞殺律定擬

乾隆八年三月刑部會議覆順德縣更夫梁裕傑被梁亞四戳傷身  
死一案據廣撫王 疏稱緣梁亞四於乾隆六年三月二十一日晚  
在村外基邊撞遇同村居住之梁瑞三共談貧苦梁瑞三告以吳大  
有觀音堂岡邊地上種有青麻正值茂盛起意謀竊梁亞四應允約  
於是夜二更時分仍在村外基邊會齊共夥二人徒手潛往偷拔青  
麻二把正欲挈麻而行適更夫梁裕傑巡見吆喝各卽棄麻奔逸梁  
瑞三落後梁裕傑趕上用馬叉柄打傷右臙肋倒地梁亞四業已遠  
遁梁裕傑當將梁瑞三扭獲告知事主吳大有協同解縣二十四日  
梁裕傑在村邊遇見梁亞四亞四聲言梁裕傑不應捉拿梁瑞三送  
官梁裕傑以二十一日夜偷拔青麻尚有一賊奔逸必係梁亞四卽  
扭住梁亞四欲行解究梁亞四情急圖脫拔出身佩小刀向戳致傷



梁裕傑左脇梁裕傑釋手坐地叫痛梁亞四旋即奔避時有楊觀嗣在園鋤地聞嚷往視詢知情由往報梁裕傑之父梁景昌扶掖回家梁裕傑傷重越三日殞命亞四供認不諱將梁亞四照罪人拒捕殺人律擬斬監候刺字等因具題經臣部等衙門查審理拒捕殺人重案必須情罪明確毫無疑義方成信讞此案梁亞四用刀戳傷梁裕傑越三日身死自應擬抵但于罪人拒捕情形尚多疑竇查是夜有二人偷拔地上青麻二把原屬曠野且偷拔無多梁裕傑撞遇彼時業已丟棄梁裕傑將一人赶上打倒捉拏送官其一人逃走梁裕傑並未認識追事隔三日梁亞四斥其不應送究亦屬同里議論常情梁裕傑乃據指為是夜夥盜既屬懸揣並無確據况亞四如果同竊豈有不畏梁瑞三到官供出差人捉拏尚敢公然不避面斥梁裕傑之非且梁亞四之同竊與否梁瑞三既已拏送三日地方官並未先行取具梁亞四夥竊的供乃因屍親稟報梁亞四為匪黨持刀即照依報詞扶同審實擬以罪人拒捕夫安知非夥偷另有別人梁亞四罪犯殺人遂於同竊情節難以分辨乎再查律載犯罪逃走及雖未逃走官司差人追捕有拒捕殺人者斬監候一條是必係應捕之人確知其為罪人當時追捕因捕而拒始於律例昭合梁亞四之夥同梁瑞三偷竊與否梁裕傑當夜既未認識官司又無明文不過因其斥責生疑欲行扭送並非明知其為罪人而捕既非明知其為罪人而捕即不得指一時角口起釁而為拒捕之確據事關駢首重案不便率結應令該撫轉飭承審各官再行虛心詳鞫妥擬具題到日再議等因題駁去後今據該撫疏稱覆加研訊如奉駁是夜有二人偷拔青麻梁裕傑撞遇將一人捉拏送官一人逃走並未認識追事隔三日梁亞四責其不應送究梁裕傑據指為是夜竊盜既屬懸揣並



無確據况梁亞四如果同竊豈有不畏梁瑞三到官供出差人捉拏尚敢面斥梁裕傑之非一節訊據梁亞四供稱乾隆六年三月二十一日夜實同梁瑞三偷拔青麻後被梁裕傑巡見跑走回家當夜梁裕傑本未認明其指梁亞四爲逸匪原屬懸揣無據之詞因梁亞四是夜實往同竊被其說破一時心虛情急圖脫故拔小刀抵戳梁裕傑身死其梁瑞三雖被捉拏送官因平素相厚料其必不供出且當夜賊已丟棄諒無重罪若一躲避反恐貽累妻子至梁亞四當夜棄麻先走意謂梁裕傑未經看見不知尚有同夥是以敢於斥責梁裕傑之非嚴詰至再果無別情又奉駁梁亞四之同夥與否梁瑞三旣已牽送三日地方官並未先行取供乃因屍親稟報梁亞四爲匪黨持刀卽照依報詞扶同審實擬以罪人拒捕安知非夥偷另有別人梁亞四罪犯殺人難以分辯一節查梁瑞三拏獲送縣雖已三日因

梁瑞三被傷臙肘深重押候醫治是以尚未訊供迨梁亞四戳傷梁裕傑身死屍親報縣拘訊並未加刑卽據梁亞四將夥同梁瑞三偷竊情由供認並非因屍親報詞扶同審實卽今質之梁瑞三仍堅供實與梁亞四二人偷麻並無另有別人細加究詰矢口不移查律載罪人拒捕者斬此必奉官差拏或當場因捕而拒者方坐今梁亞四雖夥同梁瑞三行竊但梁裕傑本不知其爲有罪之人且非奉官差拏與因捕而拒者有間原擬罪人拒捕之條誠如部指未符梁亞四係被扭圖脫拔刀指嚇以致戳傷梁裕傑身死尚無欲殺之心除竊盜未得財爲從輕罪不議外應改依聞殺律擬絞監候等因具題應如該撫所題梁亞四合依聞毆殺人者不問手足他物金刃律擬絞監候秋後處決該撫旣稱梁瑞三仍照原擬笞五十免刺業經先行折責發落等語應毋庸議又該撫原疏內稱楊觀嗣救阻不及先行



摘釋本案竊夥實止二人並無窩線亦無同居親屬知情所拔青麻已經事主檢回均毋庸議行充小刀一把銷燬等語均應如該撫所議完結再該撫疏稱本案從前錯擬職名係順德縣知縣許龍章廣東按察使潘與臣王但遵照部駁自行改正例得免議其率轉之前任廣州府汪會正業已病故職名毋庸開報等語查定例督撫具題事件有情罪不協律例不符之處部駁再審該督撫虛心按律例改正具題將從前承審舛錯之處免其議處等語除廣州府知府汪會正已經病故毋庸議外從前承審錯擬之順德縣許龍章廣東按察使潘巡撫王俱已遵駁改正相應免議奉

旨梁亞四依擬應絞着監候秋後處決餘依議

懷恨謀毆致死改故殺

康熙五十一年十二月刑部議得直撫趙弘燮疏稱陳大有陳得功偷竊營生因該縣清查牌甲冀琮身充地方將大有等舉報責懲後大有等復在河南儀封縣偷竊潛歸經封邑開提冀琮又報官差拿大有等遂爾懷恨于康熙五十一年二月十一日大有見冀琮入城遂商同得功欲挖斷冀宗眼腿以洩前忿遂持小刀與得功偵候中途見冀琮暮歸上前按倒大有扎冀琮左眼角太陽并斷其脚筋得功亦扎冀琮右眼角而遁以致冀琮傷重殞命歷審自認情真將陳大有依同謀共毆人因而致死律擬絞具題前來查陳大有等屢行偷竊因冀琮身充地方舉報責懲遂懷恨帶刀將冀琮太陽扎傷割斷脚筋殞命明係故殺今照同謀共毆人律擬以絞抵與律不符陳大有合改依故殺律擬斬監候奉



旨陳大有依擬應斬着監候秋後處決

夥衆偷鹽拒捕殺人

康熙五十四年十二月刑部會看得劉天訓等偷鹽打死閻福盛一案據山西巡撫蘇克濟疏稱有在逃張八子起意糾合未獲之李禿子與已獲之劉天訓偕大李四王女子同夥六人是夜各持器械推車兩把前赴往由禁墻口子爬入行至庵前偷鹽有看庵人閻福盛知覺聲喊張八子恐其識認喝令劉天訓等橫毆劉天訓執鉄鞭杆毆傷福盛右肱肘骨大持鉄尺擊傷左肱肘等處在逃之李禿子持鉄尺擊傷左右兩臙肱張八子用鉄鏟毆傷頂心額顙等處偷鹽兩車而歸福盛受傷深重次日殞命歷審各認不諱查定例內康熙二十七年十月內部覆東撫審擬因楊會尹等拒捕殺巡鹽人蘇頂臣等將爲首之楊會福擬斬下手之楊會洪等擬絞俱監候未下手之楊會尹擬軍嗣後十人以下執有軍器拒捕者俱照此例治罪等因



具題奉

旨遵行在案今劉天訓等六人偷鹽毆死看庵人開福盛與此例相符將  
 劉天訓等擬以絞成林罪具題據此劉天訓咎大照楊會洪下手例  
 擬絞監候秋後處決李四王女子俱照未下手例各命妻發邊衛充  
 軍至配所各杖一百折責四十板在逃之首犯張八子并李禿子獲  
 日另結該撫既將斗級楊起盛焦得勝俱照不應重律已經責釋無  
 庸議奉

庸議奉

旨劉天訓咎大俱依擬應絞着監候秋後處決餘依議

竊盜拒捕殺人援免

乾隆六年十二月刑部會議覆竊犯唐阿辰夥竊惠來縣民黃詒輔  
 舖內銀物拒捕致傷事主身死一案據廣撫王 疏稱緣首犯吳文  
 欽探知黃詒輔綢緞布舖稍有財物起意行竊於康熙四十八年三  
 月初一日適遇唐阿辰商量糾黨唐阿辰應允糾合王友和胡阿武  
 各皆允從約定在吳文欽家聚會至期各帶鐵鑽刀械共夥四人吳  
 文欽攜帶竹篙一條二更時分潛至事主右隣空舖屋上折開瓦滄  
 屋挖孔轉入黃詒輔舖內開出後門吳文欽胡阿武在外接贓唐阿  
 辰王友和入舖偷竊銀兩貨物接連而出旋因事主醒覺叫喊王友  
 和先出同各犯携贓奔回吳文欽家中唐阿辰在後被事主黃詒輔  
 向前抱住唐阿辰用手推跌致傷黃詒輔額角黃詒輔扒起復向抱  
 唐阿辰唐阿辰情急將腰刀劃傷黃詒輔咽喉倒地唐阿辰携取贓



被回至吳文欽家分贓而散事主黃詒輔傷重延至是月初五日殞命嗣據王友和赴營投首供開同夥姓名拘獲吳文欽胡阿武因唐阿辰在逃王友和等各認聽從入夥行竊分贓其起意糾黨謀竊俱稱係唐阿辰爲首究其何人下手殺傷事主堅供是夜實止唐阿辰一人入舖偷竊餘俱在外接贓不知事主被殺情由將王友和等照竊盜得財四十兩爲從律擬以杖刺援免追贓完結勒緝逸犯唐阿辰獲日究擬在案嗣於乾隆五年十一月十九日據屍子黃應錦訪知該犯潛回報縣拘獲併喚先獲審結之胡阿武質訊據唐阿辰將同謀糾黨行竊得贓及殺傷事主身死并胡阿武等前審混供各實情一一供認不諱唐阿辰洵爲本案兇賊無疑除先獲審結後在家病故首犯吳文欽夥犯王友和均不議外查竊盜臨時拒捕殺人定例擬斬立決但雍正二年四月內准刑部咨福建撫臣黃 將拒捕


毆死事主竊盜馬伯照律擬斬監候具題部議改照竊盜拒捕殺人例擬斬立決奉

旨竊盜拒捕傷人所定新例始行曉諭人未盡知馬伯改爲應斬監候欽此復經定以廣東福建等省於行文後以八個月爲期過其月日有犯竊盜拒捕殺人者照依新例定擬等因奉

旨依議欽遵在案今唐阿辰行竊拒捕傷死事主係在未獲竊盜臨時拒捕殺人擬斬立決定例之先唐阿辰合依竊盜臨時拒捕殺人律擬斬監候仍刺字再查康熙六十一年十一月二十日

恩赦具題案內有竊盜拒捕殺死事主擬斬監候之竊犯方阿通等聲請援免准到部覆免死減等杖一百流三千里發配在案又雍正十二年九月初三日

恩赦具題案內有原依竊盜拒捕殺人例斬決部改監候之竊賊關亞乾





援例聲請減等部覆不准援免亦在案今唐阿辰事犯在屢次

**恩赦**以前相應聲明聽候部議胡阿武擬杖援免等因具題查律內竊盜臨

時拒捕殺人斬監候又雍正二年定例竊盜臨時拒捕殺人擬斬立

決各等語今該撫既稱唐阿辰於康熙四十八年三月初一日行竊

拒捕傷死事主在未定例之先應如該撫所題唐阿辰合依竊盜臨

時拒捕殺人律擬斬監候秋後處決照例刺字再該撫疏稱康熙六

十一年十一月二十日

**恩赦**具題案內有竊盜拒捕殺死事主擬斬監候之方阿通等聲請援免部

議免死減流在案又雍正十三年九月初三日

**恩赦**具題案內有原依竊盜拒捕殺人例斬決部改監候之關亞乾援例聲

請減等部覆不准援免亦在案唐阿辰事犯在屢次

**恩赦**以前相應聲明聽候部議等語查雍正元年七月內臣部議覆署廣撫

年 將竊盜拒捕殺死事主之方阿通等聲請援

赦免罪具題經臣部查本年四月初三日將竊盜拒捕之王驢兒等援

赦具題奉

旨這案內王驢兒董富劉國寧崔四係竊盜拒捕殺人王明水梁弘富係因

姦威逼致死人命其後議劉玉學亦係竊盜搗斃人命將伊等雖議援赦

免死釋放情由可惡着仍流三千里欽此應將方阿通等俱免死減流題

結在案至關亞乾事犯在定例之後擬以斬決具題奉

旨交九卿議覆以關亞乾偷竊田薑與入室偷取財物殺人者有間改為

斬監候於雍正十三年

恩赦具題案內臣部議以不准援減亦在案今唐阿辰事犯時尚未有定

斬決之例且在屢次

恩赦以前與方阿通等情事相同非關亞乾事犯在定例以後可比應將



唐阿辰免死減等僉妻流三千里至配所折責四十板該撫既稱胡阿武雖未拒捕亦未到場助力但前審不將實情供明亦屬不合除行竊爲從擬杖前經援免不議外合依先行誣詐後供實情例杖八十但胡阿武事犯在雍正十三年九月初三日

恩赦以前相應援免唐阿辰所得未起之贓應於該犯名下照追給領胡阿武應賠之贓先經追給無庸議追行究舊爛腰刀鉛燬鐵鑽據供手棄無憑起追等語均應如該撫所議完結再該撫疏稱本案行竊拒捕殺人係在定例以前踈防職各應免查叅同夥四人俱已全獲並無另有窩線等語查先經吏部議覆河南按察使隋人鵬條奏竊盜臨時同夥拒捕俱照強盜案件揭叅踈防於乾隆三年三月內奉旨此案今此案竊盜四人拒捕殺人俱已全獲且在定例以前應免議奉旨依議查閩亞乾原非護贓格開與斬決之例不符似應援減

竊盜糾眾追遇事主攢戮身死

雍正七年九月刑部會議覆寧化縣民黃金生等行竊拒捕戮死巫良英一案據福撫劉疏稱緣黃福探知巫良英家有牛隻起意偷竊雍正五年三月初八日值黃金生到家遂與黃金生商量黃金生卽轉邀黃毛赤馮文巫良范宗周運黃福又喚令雇工周永同夥八人是夜二更時候約定黃毛赤等六人在村外等候接牛黃福隨帶鉄鈹同黃金生前往巫良英家挖開牛欄偷出黃牛一隻卽聞裡面响聲恐人知覺將牛牽至村外交與周永接牽約俟次日賣銀俵分各先散夥惟周永黃福黃金生將牛牽到黃福門首適巫良英旋起飼牛驚覺卽同巫可鑑官應世巫寄禾黃佛穩巫應彩等隨帶木棍跟牛踪跡追至黃福門首黃金生知覺躲避當獲黃福周永并牽回牛隻黃金生恐事發又喚齊黃毛赤馮文巫良范宗周運各執鎗棍



等械趕追拒捕至把火街地方趕遇巫良英等巫良英卽令巫寄禾等押帶黃福周永牽牛先行已同巫可鑑官應世持棍攔抵黃金生卽以竹篙鎗戳中巫良英左腮腋右乳馮文亦用竹篙鎗戳巫良英右手背後肋黃毛赤亦用竹篙鎗戳巫良英右脇巫良英喊罵黃金生又以鎗戳巫良英左腋肋仆跌掙起黃金生復用鎗戳其腰眼倒地巫可鑑向前趕打黃金生又鎗戳巫可鑑額角偏左黃毛赤亦用鎗戳巫可鑑食氣顛右手背血盆骨左肋等處巫可鑑等喊救時已天亮各盜恐人赴援俱各逃散巫良英傷重逾時殞命巫可鑑傷輕旋經平復陸續緝獲黃金生等歷審各認不諱將黃金生等擬以斬決戍杖等因具題應如該撫所題黃金生合依竊盜拒捕爲首殺人例擬斬立決馮文巫良范宗俱合依拒捕殺人爲從例刺字僉妻解部咨送戶部將馮文發吉林烏喇巫良發白都諾范宗發寧古塔酌給當差之人或給披甲人等爲奴該撫旣稱黃福周永俱先被捉獲不知拒捕情由黃福合依盜牛一隻例枷號一個月杖八十折責三十板周永合依爲從減一等例枷號二十五日杖七十折責二十五板俱照例刺字先行發落應毋庸議脫逃之黃毛赤周運嚴緝獲日另結奉

旨黃金生着卽處斬餘依議



在山偷牛致死事主亦擬斬決

雍正六年七月刑部議覆廣撫孔 疏稱劉亞貴稔知蒲仔地方牧牛起意行竊雍正五年十二月十八日商同劉祥士劉秀士至蒲仔州地方劉祥士登高瞭望劉亞貴劉秀士各偷牛一隻被放牛之李亞女看見叫喊劉亞貴恐事敗露將牛一併交與劉秀士牽去劉亞貴捉住李亞女將褲帶套勒咽喉當即殞命歷審不諱除劉祥士取供後病故不議外將劉亞貴擬以斬決等因具題劉亞貴合依竊盜拒捕殺人例擬斬立決劉秀士牽牛先走不知殺人情由應照盜牛初犯充軍例係為從減一等杖一百徒三年奉

旨依議

